

Ceremonia relaciona cu celebracion aña di Rey

DIASABRA 26 di april proximo lo tin un ceremonia special relaciona cu celebracion di aña di Rey. Ta pa prome bes cu den Reino Hulandes cu nos lo celebra aña di Rey na ocasion di cumpleaños di su Mahestad Rey Willem Alexander.

E ceremonia lo cuminsa pa 9 or di mainta den Wilhelmina Park y lo conta cu presencia di Su Excelencia Gobernador Sr. Fredis Refunjol, Prome Ministro mr. Mike Eman y otro ministronan, miembronan di Parlamento y varios invitado.

E programa lo cuminsa cu inspeccion di e "erewacht" forma pa miembronan di Marina Real door di Gobernador Refunjol. Miembronan di Marina Real lo toca "Aruba dushi Tera" y "Wilhelmus" y lo hisa bandera di Aruba y di Reino.

Hobennan di gruponan hubenil uniforma lo ta presente tambe pa duna honor na e dia special aki.

Presidente di Parlamento Sra. drs. Marisol Lopez-Tromp lo expresa palabranan di pabien na nomber di e comunidad Arubano na ocasion di cumpleaños di Rey.

Gobernador di Aruba tambe lo tene

un discurso pa muestra e simpatia cu Aruba tin pa Cas Real di Hulanda. Grupo Melodia, consistiendo di varios hoben lo presenta dos cantica pa tur presente.

Un otro parti di e programa ta e entregamento di e premio Copa Hubenil Gobernador Felipe B. Tromp. E ganado pa e aña aki ta Steven Max Lageveen, un hoben cu for di chikito ta practica e deporte di windsurfing. E lo ricibi su premio for di man di Gobernador di Aruba. Na final di e programa e gruponan hubenil uniforma lo marcha for di parkeerplaats di Renaissance Seaport Mall pa Juliana school. Dilanti di Wilhelmina Park autoridadnan presente lo presencia e desfile di e hobennan y duna aprecio pa nan participacion.

Comision Celebracion Dianan Nacional ta invita mayornan y hobennan pa bin presencia e ceremonia den Wilhelmina Park diasabra 26 di april for di 8.30 di mainta.

Den diferente districto rond Aruba lo tin actividadnan cultural, social y deportivo pa celebra e prome Aña di Rey of Dia di Rey.